



West Bengal nung Uniform Civil Code benoktsü

FIFA WC 2026: Ivory Coast, Ecuador, Netherlands & Turkey takok angu



VOL. XXIII ISSUE NO. 254 (ADOK 254)

DIMAPUR

KÜPTOKNÜ (SATURDAY)

AAMI (JUNE) 27, 2026

₹ 5.00

NE state tem longjemer drug aziüoktsü: Nagaland DGP

Kohima, June 26, 2026 (TYO): Northeast nung police ajak külemi drug trafficking aziüoktsü atema sentong ka renemdar aser iba ya taruba anogo 10 tsüngda renemtsü imlar ta Nagaland Director General of Police (DGP) Rupin Sharma-i ashi.

"Northeastern state tem nungi Director General of Police aser Anti-Narcotics Task Forces tekolaktemi drug trafficking networks anema külemi mapa inyaksü sentong atonger" ta pai ashi.

"Tesüiba hopta ana tsüngda North-East states nungi DGPs aser Anti-Narcotics Task Force tekolakpurtem külemi jembitepa arur" ta Rupin Sharma-i ashi.

"Mizoram mesüra Manipur nungi Nagaland-i drugs bener arurtem Nagaland mesüra Assam mesüra West Bengal nung mejenbutsü. Kasaji, Manipur mesüra Nagaland nung drug ayokertem dang nungi alizüoktsü merangertem police aser law enforcement agencies-i tenük yoktsü" ta pai ashi.

Iba sentong ya taruba anogo 10 shi tsüngda nung renemtsü aser iba ajanga mapa tajungba inyaka aotsü ta paisa shisem.

Nagaland nung drug anema tongpang nung takok angur asü koda ta osangbeneri asüngdangdang "iba mapa nung

terenlok lir saka police kija nem dang meinyakdaksütsüla kechiyong iba tongpang nung ajaki raratettsü" ta DGP Sharma-isa langzü.

Tetsürtem aser tanurtem kümzüka ayutsü atema Nagaland Police-i tongtipang jilatem nung facial recognition aser CCTV surveillance systems enoktsü sentong lir ta pai ashi.

"Tashiyim aser tim masüba inyakba ya lokti khuret ka lir. Ibala tatalokba atema public-i osang sangoktsüra police-i noktangtetsü. Kodang ibala ya kibongtem nung aser kidang atalokra ozüng amertem dang meshira noktangsü tasak lir. Ajisüaka police-i public tesemtem nung kümzüka ayutsü maparen inyakdar" ta DGP Sharma-isa metetdaksü.

"Nagaland nung tongtipang jilatem nung onoki facial recognition cameras, surveillance cameras aser CCTV cameras enoktsü sentong lir. Item inyakyim ajanga tarutsü anogotem tetsürtem aser tanurtem lendong nungi jenbua alitsü imlar" ta paisa ashi.

"Nagaland nung police patrolling teimba kümogo aser takoksa ajururtem mesüra kinungertemi menungnango police nem osang sangoktsütsü ayongzüker" ta Rupin Sharma-isa shisem.

Naga teloktemi KZC sangdong magizüker

Imphal, June 26, 2026 (Agencies): Kuki Zo Council (KZC)-i Naga nungertepsetba atema tatok meshiba magizüker ta All Naga Students' Association Manipur (ANSAM)-i metetdaksüogo.

KZC ajanga sangdong agütsüba ya chichiba tatok meshiba mesüra iba tatalokba atema tebilemtsü khuret agiba masü. Iba sangdong ajanga May 13 nü Naga nungertrok tashiyim agi pua bener ao aser tepset ta tai tongloktstüba jangjashitsür. Iba sangdong ya tayongzüker ka ama lir aser temulung raksaba masü saka Naga nungertrok mezüngmeshiba ama lir ta ANSAM-i ashi.

"Tai maketba Naga nungertrok apuba, reshikangshiba aser tepsetba nung shilem agir ajak maitsü jangjateta pua maru tashi aser ozüangi melaba ama temerenshi magütsü tashi tatok meshiba kcha magizüktsü" ta parnokisa ashi.

"Kuki-Zo Council-i tatok meshiba ya Naga nungertrok tepsetertem tenüng nung asü mesüra parnok-a iba tatalokba nung densemba agi tatok meshir'ar jangjanür. Maneni Kuki-Zo kübok aliba telok ajak tenüng nung KZC-i jembitsü tashi lir mali onoki metetnür" ta ANSAM-isa metetdaksüogo.

May 13 nü Noney district kübok Kotzim aser Kotlen

yimtsüngtem tsüngda mejangjatetba nisung kari Thadou arogo lennir asem tepsetba nung Naga nungertrok shingia shilem magi aser Naga nungertrok tai tongloktstüba atema kuli kecha mali ta ANSAM-isa nenshiogo.

Parnokisa Manipur aser India sorkartem dang Naga nungertrok tepsetertem pua ozüng tapet agi merenshitsü takhangba agütsüogo.

Külen, Naga People's Network Forum (NPNF)-ia Kuki-Zo Council (KZC) chairman Henlianhang Thanglet ajanga "Kacha Naga" ta mezüngmeshia jembiba aitsüogo.

NPNF ya Naga Youth Alliance kübok lir aser iba sabang nung Nagaland, Manipur, Arunachal Pradesh, Myanmar aser Delhi nung aliba Naga kintem nungi lanurtem aser sensotem dena lir.

"Kacha Naga" ta ajaba ya tai lir aser Naga nungertrok iba tenüng mamshir aser magizüker. Mapang shia Naga nungertrok maitsü, putiotsü aser akhüm raksatsütsü atema iba olen amshia arur ta NPNF-isa ashi.

"KZC Chairman Henlianhang Thanglet aser Kuki-Zo Council (KZC) ajanga iba olen amshia sangdong agütsüba meyipa agitsü aser Naga nungertrok tatemzüker kecha melii tatok meshitsü akhangert" ta parnokisa metetdaksüogo.

CM Rio-i lisopur maitsü, customary laws kümzüka ayutsü nangzüker



June 26, 2026 nü Ziekezou, Kohima village nung Kohima Village Multipurpose Building lapoktsüdag Chief Minister Dr. Neiphiu Rio den külemi Deputy Chief Minister Y. Patton aser tangartem külemi agiba noksa ka angur.

Kohima, June 26, 2026 (TYO): State sorkari Nagaland nung lisopur maitsü aser customary laws kümzüka ayutsü tenangzüker lir aser sendaktepa alir ajaki amalitepa Inner Line Permit (ILP) maparen akangshitsü ayongzüker ta Chief Minister Neiphiu Rio-i nenshiogo.

Ziekezou nung Kohima Village Multipurpose Building lapoktsüba sülen Dr Rio-i "Constitution nung Arla 371A aser Bengal Eastern Frontier Regulation (BEFR), 1873 kübok Naga nungertrok pei sobaliba, inyangsangshi aser village governance system wazüka yuteter" ta ashi.

"Nagaland nung village

councils-i yimtsüng ka nung shiba lisopur kuli agütsür aser Nagaland nung non-locals-i ozüangi melaba ama alitsü aser mapa inyaksü akok saka parnok nem lisopur jenjang magütsütettsü" ta paisa ashi.

CM Dr. Rio-isa village councils, ali kiburtem, mapa inyangdaksürtem, rejutem aser sendaktepa alirtemi ILP akangshitsü aser indigenous certification tim mesüi amshiba noktangsü atema non-local kuli tejangia agütsütsü ayongzüker.

"2027 Census nung public-i shilem tajung agitsü mepishir kechiyong population data shitak ayuba ya sentong renemba aser rongsen lemsaba asoshi kanga

tongtipang lir. Tesüiba census nung nütsüng yongsük onsara enokba ajanga education aser welfare amala wadangtem nung development planning nung kongshio. Anungji civil society organizations (CSOs), village councils aser sensotemi iba census nung nütsüng yongsük shitak sayutsüsa inyaksü ayongzüker" ta Dr. Rio-isa metetdaksü.

Nagaland nung village councils ya elections masü selection ajanga ketdangsüa aotsüla. Sobaliba inyakyim ajanga telongjem ajungketer saka election agira iba ajanga yimtsüngtem nung telemsa adoktsü ta paisa ashi.

Drug anema inyakba nung yariteptsü ayongzüker

Kohima, June 26, 2026 (TYO): Social Welfare Advisor Wangpang Konyak-i lokti dang drug anema noktaksü aser arogo, tentet balala aser shisaliok rejutemi prevention, counselling aser rehabilitation nung shilem agitsü ayongzüker.

Kohima nung International Day Against Drug Abuse and Illicit Trafficking indang sentong ka agidang Advisor Wangpang-i Nagaland nung drug achiba khuret atema tebilemtsü lemsatet.

Drug achiba ya ozüng alema inyakba mapa ka ama dang masü saka public health tebilemtsü khuret ka ama züngshitsüla ta pai ashi.

Tanü alima nung addictive synthetic drugs kanga bulua amshir aser technology amshia drug shibelener, talisa smartphones aser digital sabangtem ajanga lanurtem dak tenük yoka drugs belenshir ta paisa shisem.

Nagaland-i international border routes den anasatepa aliba

ajanga drug shibelenba agin kongshir aser lanur aikati drug achir ta Advisor Wangpang-isa metetdaksü.

Centre sorkari tenzüker Nasha Mukt Bharat Abhiyaan ajanga temerenshi masü saka reduction, counselling, rehabilitation aser data-driven interventions nung temulung agütsür. State sorkaria District Level NMBA Committees ajanga awareness campaigns ulushio, NDPS Act aser border surveillance akangshio aser de-addiction centres teimba akümtsü meranger ta paisa ashi.

Nagaland sorkari "War on Drugs" campaign tenzüker saka iba khuret ya sorkar kijai dangbo mekoktetsü. Iba nung arogo lennirtemia yariteptsüla kechiyong lokti asoshi arogo dak tashi lir aser nenoki counselling units amenoktsüla, drug achirtem bendanga amshiba tangatetba agientsüla, Alcoholics Anonymous aser Narcotics Anonymous amala recovery

groups yaritsüla aser youth mentorship programmes akangshitsüla ta Advisor Wangpang-isa ayongzüker.

Paisa tetsütem telok, lanur aser kaketshir teloktem aser yimtsüng nung telok balala dang awareness, sports, music aser skill development maparen ajanga drug-free tesemtem kümdaksütsü ayongzüker.

Maneni, tesayurtemia kaketshirtem rongnung substance abuse aser mental health challenges jangjatsüla ta paisa ashi.

"Substance abuse ya ozüng tsütsü tayongzüker ka dang masü saka public health, social development aser family issue ka lir" ta Social Welfare Secretary Limawabang Jamir, IAS-ia ashi.

Viksit Bharat mangdang atongtsü asoshi Nasha Mukt Bharat Abhiyaan kübok drug-free India ka nüngdaker. Nagaland ya Golden Triangle anasa aliba ajanga drug shibelenba agi kanga kongshir ta paisa ashi.

Nagaland nungi ketdangsürtemi Tripura semdang

Dimapur, Aami/June 26 (TYO): Tripura nung renewable energy projects dak sendakba tesemtem semdanga shisa lemsateptsü atema Department of New and Renewable Energy, Government of Nagaland nungi ketdangsürtemi June 23, 2026 nü iba state semdanga liasü.

Nagaland nungi iba delegation ya Advisor, New and Renewable Energy, Government of Nagaland, Picto Shohe-i anir oa liasü. Iba mapang parnoki June 24, 2026 nü Ratan Lal Nath, Minister, Department of Power,

Government of Tripura ajurua liasü. Iba delegation tour atema nüngdakba teyari agütsütsü asoshi Nagaland sorkari Abhishek Singh, Secretary, Department of Power, Government of Tripura den osang agitepba sülen parnok oa liasü.

Iba mapang osangtsüasang agiteptsü atema point person ama Renilo Nuh, Joint Director, NRE shima liasü.

Nagaland nungi Advisor, New & Renewable Energy, Government of Nagaland, Er. Picto Shohe; Secretary, NRE,

Nagaland, Linda Solo; Director, NRE, Er. James Khala; Additional Director (Retd), Department of Soil & Water Conservation, Nagaland, Khekiho Shohe; Joint Director, NRE Er. Renilo Nuh; Deputy Director, Neizeno Peseyie; Junior Engineer, Er. Sentinungsang Atsonchanger; Junior Engineer, Er. Sheanyu Konyak; Mughalu Yephthomi - PA to Er. Picto Shohe, Adviser, NRE; Aophia Shohe - PA to Er. Picto Shohe, Adviser, NRE nungertem oa liasü.

Dimapur nung June 28 nü National Immunization Day amungtsü

Dimapur, Aami/June 26 (TYO): Office of the Deputy Commissioner, Dimapur ajanga sangdong ka nung Village Councils, GBs aser Colony Chairmen ajunga dang June 28 nü National Immunization Day (NIC) for Polio atema June 26 aser 27 anogotem nüburtem

dang sangdongtsü totuyuba agütsüogo.

Iba immunization drive nung nübur timba shilem agidaktsütsü aser tsürabor aser kinunger tem dang pei tanurtem anasatiba immunization booth-i anir arutsü ajungmesotsü nükjidong

nung iba awareness campaign ya ayongzüker, ta ashi.

June 28 nü arishi küm 0-5 tsüngta tanur ajunga nem polio vaccine drops ana agütsütsü, anungji nüburtemi temsüa aliba tanur ajunga iba mozü jemdaksütsü ayongzüker, ta sangdong ajanga ashi.

Mangkolemba nung Nasha Mukta Bharat Abhiyan sentong agi

Dimapur, Aami/June 26 (TYO): Drug Free India (Nasha Mukta Bharat Abhiyan) indang anogo ana sentong ADC Conference Hall aser Town Hall, Mangkolemba nung June 25 & 26, 2026 anogotem agia liasü.

June 25 nü sentong nung Mangkolemba Town Council, Village Councils, CSOs aser GBs tem aden, kong shisalen sayur Dr. Sentimental, SMO,

CHC, Mangkolemba aser Rongsensashi, SDPO, Mangkolemba liasü. Iba sentong nung akhumdong ka ama SDO (C), Mangkolemba, Rohbi Sangtem aden.

June 26, 2026 nü sentong nung kaketshir, lanurtem aser Person with Substance Use Disorder dena liasü, kong shisalen sayur Dr. Mungro Imchen CHC, Mangkolemba aser Inspector Sashi, OC, PS

Mangkolemba liasü.

EAC Alongkima, Mhathung Ngullie-i sentong nung o tatsüka jemb. Anogo ana sentong nung "Talk on Drug and Substance Abuse" aser "Legal Provision Relating to Drugs and Narcotics" onük nung ajemdaker shisalen sayurtemi jembia liasü. Iba sentong ya District Administration aser Department of Social Welfare, Mangkolemba ajanga ayongzüker.

Mokokchung DPDB senden nung tongtipang telemtetba kar agi

Dimapur, Aami/June 26 (TYO): Ita shia amenba Mokokchung District Planning & Development Board (DPDB) senden June 26, 2026 nü Deputy Commissioner, Mokokchung indang Conference Hall nung takok ngua menogo.

Iba senden ya Deputy Commissioner & Vice Chairman, DPDB Mokokchung, Ajit Kumar Verma, IAS lenisüba kübok mena liasü.

Iba senden tenzüka taoba senden nung telemtetba agia alibatem pela reprangshitep aser Action Taken Report nung jembishinü aka.

House nung Tuberculosis (TB) agi shiranger adopt süa parnok nem chiyongtsü teyari agütsütsü asoshi telemtetba tongtipang ka agia liasü. District nung department shiai tajemba agi TB patients ana bosa adopt asütsü züngsem temi mulungtepa agizüka liasü.

Iba teyar maparen nung senotsü tajungba nung anepalutsü asoshi nutritional support atema senotsü ya District Planning Officer, N.

Chuba Phom ajanga bendentsü aser bendenba sen ya DPDB ajanga Medical Department nem amoktsütsü ta lemtet.

Senden nung board-i society asem - Society for Economic Elevation and Development (SEED), Changdang Village; MI-Tzü Sustainable and Conservation Society, Alongkima aser Falcon Club, Mangkolemba registration asoshi application agizüka liasü.

Dr. Madhavi R, IAS, Assistant Commissioner and Nodal Officer for Nasha Mukta Bharat Abhiyaan-NMBA, Mokokchung ajanga International Day Against Drug Abuse and Illicit Trafficking anogomung amungba indang tongmelang agi lemsatep.

Executive Engineer, Water Resources Department ajanga department inyakyim balala indang PowerPoint presentation agütsü aser taruba senden nung department inyakyim lemsateptsü Rural Development Department nem nungloktsü.

District Hospital Dimapur indang phone number melener

Dimapur, Aami/June 26 (TYO): Medical Superintendent, District Hospital, Dimapur ajanga sangdong ka nung Dimapur District Hospital indang phone number 9383156227 dangi

melenogo aser yangji WhatsApp amshir, ta metetdaksü.

Anungji teyari/osang agiteptsü asoshi iba number nung jembitsü akok, ta sangdong ajanga ashi.

Kohima nung 5Km Awareness Run on Drugs ayongzüker



Dimapur, Aami/June 26 (TYO): Nagaland Police-i June 26, 2026 nü nü International Day Against Drug Abuse and Illicit Trafficking nüngrttem nung 5Km Awareness Run Against Drugs ayongzüka liasü.

Iba sentong nung shilem agirtemi High School Junction nungi Police Headquarters (PHQ), Kohima tashi asem, kong nisung 308-i shilem agia anti-drug awareness campaign nung nüburtemi amalitep akaba sayua liasü.

Iba sentong ya "One Run, One Voice, A Drug-Free Nagaland - Choose Life, Not Drugs" omen kübok agia liasü, kobai temesepba mozü amshiba anema lungjemer nokdaksü aser nüburtem takum libaliru junga aser temang anema aliba yimyatam amshitsü ajungmesoa

liasü.

Iba asemtepba ya ADGP (Adm), Renchamo P. Kikon, IPS-i tenzüksü.

Sentong nung Director General of Police, Rupin Sharma, IPS-i jembidang, state nung temesepba mozü ayokba aser achiba tali akumba tebilemtsü lemsatep aser temesepba mozü mela-mela anguba ajanga talisa lanurtem asoshi timtem tali agütsür ta ashi.

Pai nüburtem dang tali saksalema alitsü aser külemi mera agitsü ayongzüka liasü.

State ya Myanmar aser Golden Triangle anasa lir, anungji temesepba mozü mela-mela angur aser state nütsüng yongsük shilem 5.5 nung 6 tashi temesepba mozü agi kongshia lir, ta Sharma-i ashi.

Temesepba mozü ya aika Myanmar nungi India-i bener aitdang Manipur ajanger aser Nagaland tonger linük tesem balalai belenshir, ta pai ashi.

"Nagaland-i aitba aser Nagaland nungi linük tesem balalai bener aoba temesepba mozü timba lenmang nung abener," ta pai ashi.

DGP-i state nung nüburtem asoshi tebilemtsü tulutiba rongnung temesepba mozü ya ka lir aser iba yagi takum agir aser kibong tem raksatsür ta ashi.

"Temesepba mozü mechi India nunger generation rangben ka samar. Nai khen atema temesepba mozü agiba ajanga takum tepiyong anishidaksütsü," ta pai ashi.

Sharma-i lanurtem dang narcotics nungi pila alitsü

ayongzüker aser nüburtem dang temesepba mozü shibelenba osang agütsütsü ajungshi aser iba amala osang agütsür maitsü miimbanga ayutsü ta ashi.

"Ner kibong nungi mesüra na drug addict aser na onok dangi arura, onoki na maputsü. Nüdak nungi osang meshir onoki nü dang mozü ayoker aputsü merangtsü," ta pai ashi.

Sepaitem asoshi mezüngbuba teinyaktsüji temesepba mozü achirtem pua merenshitsüb masü mozü shibelenba network raksatsütsü ya lir, ta pai ashi.

Temesepba mozü anema raraba ya police kijai makoktsü, anungji nüburtemi tali shilem agitsüla, ta Sharma-i ashi.

Pai Nagaland nung de-addiction aser rehabilitation facilities agi anünga aliba

indanga lemsatep aser addiction atema medical treatment den külemi trained psychologists aser professional counsellors teyari agitsü ayongzüker aser tamangba yimsü tsütsü kija nungi counselling agiba ajanga iba tebilemtsü mokoktettsü, ta ashi.

Iba sentong nung Sharma-i ketdangsüa anti-drug pledge agia liasü, kong shilem agirtemi temesepba mozü nungi pila alitsü, temesepba mozü amchiba nokdangba nung amalitep akatsü, iba indang awareness agütsütsü, aser temesepba mozü maliba lokti kumdaksütsü merangtsü atema pangjema liasü.

5Km Awareness Run Against Drugs nung shilem agirtem rongnung Men Open Category nung Shiangyiu T.-i mezüngbuba, Kelenguto Kulnu-i tanabuba jenjang ngua liasü.

Women Open Category nung mezüngbuba jenjang Songmo P. aser tanabuba jenjang Cekrotalu-i angu. Under 15 nung Vilaseto, Above 50 Years nung P. Kahuto, Youngest participants (Boys) arishi küm 11 tain Vizokho Pfukha aser Youngest participants (Girls) arishi küm 12 tain Ruulhounuo Kire liasü.

'Operation Amistad' kübok India-i Venezuela nem teyari agütsür



June 26, 2026 nü sepaitemi IAF tayimtsü nung teyari oset balala oshiketba mapang tangokba noksa nung angur. Venezuela nung menoknok lendong tulu ajanga nisung 235 asüba den nisung 4,300 dak tali yirur lia India-i iba linük nem teyari osettem, mozü, medical osettem aser Field Hospital Unit ka yokogo.

New Delhi, Aami/June 26 (Agencies): Venezuela nung menoknok lendong tulu ajanga nisung 235 asüba den nisung 4,300 dak tali yirur lia India-i iba linük nem teyari osettem, mozü, medical osettem aser Field Hospital Unit ka yokogo.

External Affairs Minister, S Jaishankar-i, menoknok agi kongshiba linük yaritsü atema India-i 'Operation Amistad' tenzü, ta metetdaksü.

Hokolbarnü Minister Jaishankar-i X ajanga, "Operation Amistad! Venezuela nung menoknok lendong tulu atalokba sülen iba linük nem teyari agüja tanü @IAF_MCC C17s tayimtsü ana apusoa ogo.

Tayimtsü nungji Indian Army @adgpi Field Hospital Unit ka, teyari osettem, mozü aser BHISHM Cubes ana densema medical osettem touzü, ton 35 (seret 35,000) bener yokogo," ta metetdaksü.

"Tang ama timtem mapang ka nung India-i Venezuela sorkar aser nüburtem yaritsü," ta pai metetdaksü.

Hokolbarnü Venezuela nung menoknok lendong tulu atalokba sülen Ato kilonser Narendra Modi-ia mangyim jashi lemsatapa liasü.

Modi-i X ajanga, "India nungertem tenü nung ni Venezuela sorkar aser nüburtem, talisa takoksa anguba

kibongtem den mangyim jashi lemsateper. Onoki yirua alirtem tekeraba nung taneptsü angutsü atema sarasademtsür aser tang ama timtem mapang ka nung ajak den tejashi lemsateper. India-i akokba tashi lenmang ajak nung yaritsü," ta metetdakja liasü.

Brihostibar aonung Venezuela Health Minister, Carlos Alvarado-i, menoknok lendong nung nisung 235 asüba den nisung 4,300 dak tali yiruogo, ta metetdakja liasü.

Interview ka nung jembidang minister-i, yirua alirtemji teimbaka tanurtem lir aser aika surgery agitsüsa akümer, ta metetdaksü.

Ram tekülem ki tenla auyaba ken o nung nisung 8 puogo

New Delhi, Aami/June 26 (Agencies): Uttar Pradesh kübok Ayodhya nung Ram tekülem ki tenla aika auyaba dak sendakba ken o nung FIR nung aliba nisung 8 prongla puogo, ta Hokolbarnü Uttar Pradesh police-i metetdaksü.

Special Investigation Team (SIT)-i iba ken o bushisü ngdang aser state sorkar nem agütsüba report nung ajemdaker Shri Ram Janmabhoomi Teerth Kshetra Trust nung züngsem, Krishna Mohan-i ken o agütsü aser FIR benoka liasü.

FIR nungji trust general secretary, Champat Rai den yaritepa inyaker 'Tinnu' ta ajasang Ramashankar Yadav tenü nung tangar tenet densema lir.

Osangbener den jembidang police ketdangser kati, "Tai tonglokja alir ajakji Ayodhya nung liasü. Brihostibar aonung parnok ajak puogo aser parnok dang asü ngdangyadar. Police-

i parnok ajak magistrate matsü ngdangi anir aotsü," ta metetdaksü.

Samajwadi Party nung lenirtemi Ram tekülem ki atema tenla aruba ketdangsüba nung ochimashi lir ta metetdaksüba sülen iba ken o temai adok.

Iba sülen Shri Ram Janmabhoomi Teerth Kshetra Trust-i iba ya bushisü ngdangtsü mepishiba nung ajemdaker Uttar Pradesh state sorkari iba ken o bushisü ngdangtsü atema June 13 nü züngsem ase mi akümba SIT tenteta liasü.

SIT-i mezü ng bushisü ngdangba ajanga Ram tekülem ki atema agütsüba tenla tim mesüi amshiba aser sen aika auyaba bushitet.

Taoba mapang Ayodhya nungi Samajwadi Party MLA, Pawan Pandey-i, Ram tekülem ki atema tenla agütsüba sen crore 7 nungi crore 7.5 shi samaogo, ta metetdakja liasü.

West Bengal nung Uniform Civil Code benoktsü: Suvendu Adhikari



New Delhi, Aami/June 26 (Agencies): West Bengal sorkari taruba Hombarnü legislative assembly nung Uniform Civil Code (UCC) Bill ka benoktsü.

Hokolbarnü Bengal Chief Minister Suvendu Adhikari-i, pai aniba sorkari legal inyakyim ajak benschia Uniform Civil Code ka benoktsü, ta metetdaksü.

Brihostibar aonung senden amendang Business Advisory Committee-i assembly nung iba bill ji agizüktsü atema telemtetba agiogo.

Osangbenertem den jembidang Chief Minister-i, "UCC benoktsü atema inyakyim ka lir, anungji onoki iba inyakyim kübok inyaktü. Iba Code ya Gujarat aser Assam na nung aliba den mesükteper asütsü," ta metetdaksü.

2026 küm Bengal assembly election atema BJP manifesto 'Sankalp Patra' nung party-i sorkar akümba sülen ita

trok tsü ngda UCC benoktsü nangzüka liasü.

Taküm April ita nung BJP manifesto sayaba mapang Union Home Minister Amit Shah-i UCC indang metetdakja liasü.

Bengal nung cabinet minister kati, "Uttarakhand, Gujarat, Assam, Madhya Pradesh aser Maharashtra densema state aika nung UCC benokogo. BJP-i yimsüsüba state tem nung inyakba ama tang Bengal-ia iba ya benoktsü, kechiyong election jakdang onoki iba ya nangzüka liasü," ta metetdaksü.

North Kolkata nung aliba College Street nung Bankim Chandra Chattopadhyay sor küm 189 ajungbamong sentong ka tembangba sülen osangbenertem den jembidang Chief Minister-i state nung UCC benoktsü osang ya metetdaksü.

Iba sentong nungji Chief Minister-i 'Vande Mataram' ken mejemsang Bankim Chandra Chattopadhyay nem akhüm agütsü aser state sorkari 'Vande Mataram' museum ka yanglutsü ta sangdonga liasü.



June 26, 2026 nü Malappuram district nung Congress MP, Priyanka Gandhi Vadra-i Forest Department nung Rapid Response Team (RRT) atema gari ka tenzüksüdang tangokba noksa nung angur.

CHUMUKEDIMA BRANCH
OKM Building, NH-39, 4 A D Lane 5, Ward 6, Dimapur, Chumukedima,
PIN- 797103, Email: chumuk@bankofbaroda.bank.in

ABRIDGED VEHICLE E-AUCTION NOTICE

Yangi public aser talisa sen apur (tem) aser Guarantor (tem) dang ya sangdonger, Hypothecation/Loan Agreement kübok party balalai tezüngzüktep agiba kübok tashi agüja aliba nung ajemdaker Bank-i tsü nglanglen shia aliba Hypothecated Motor Vehicle agiadokogo, aser tsü nglanglen shia aliba account/s nungi sentsüh alangzüksü atema gariji "Kong aliar yamaji", "Koma lidir yamaji" aser "Yangji aliba ajak basis nung ayoktsü. Sen apur/tem / Guarantor/tem / Gari /Sentsüh ajak / Reserve Price /e-Auction anogo aser mapang, EMD aser Bid Increase Amount ji tsü nglanglen shia lir:-

Sr No.	Name & address of the Borrower	Total Dues (in Lakhs)	Vehicle Make & Model Registration No.	Date & Time of e-Auction	1. Reserve Price 2. Earnest Money Deposit (EMD) 3. Bid Increase Amount	EMD deposit Account No. & IFSC Code Name of the Branch	Inspection Date & Time
1.	DEBASHISH KUMAR BARMAN, DIMAPUR	3.56	Make: NISSAN MOTORS Model: MAGNITE TURBO Regd. No.: NL07CB2044	14.07.2026 Time: 12 pm to 4 pm	1. Rs. 2,50,000/- 2. Rs. 25,000/- 3. Rs. 10,000/-	A/c No.: 60660015181219 IFSC: BARB0CHUMUK	10.07.2026 Time: 10 am to 4 pm

Iba sale dak sendakba nung telatetbatem metettsü atema website link <https://baanknet.com> nung repringang. Bid asütsü tejangrartemi
Mobile No.: 7975737624 ajanga Branch tekolak den tongteprateptsü akok.
* Bank telatetba nung aliba ama GST alitsü.
Date: 26.06.2026, Place: Chumukedima
Authorised Officer, Bank of Baroda

DIMAPUR BRANCH
Nyamo Lotha Road, Opposite Christian Higher Secondary School,
Dimapur- 797112, Nagaland, Email: DIMAPU@bankofbaroda.bank.in

ABRIDGED VEHICLE E-AUCTION NOTICE

Yangi public aser talisa sen apur (tem) aser Guarantor (tem) dang ya sangdonger, Hypothecation/Loan Agreement kübok party balalai tezüngzüktep agiba kübok tashi agüja aliba nung ajemdaker Bank-i tsü nglanglen shia aliba Hypothecated Motor Vehicle agiadokogo, aser tsü nglanglen shia aliba account/s nungi sentsüh alangzüksü atema gariji "Kong aliar yamaji", "Koma lidir yamaji" aser "Yangji aliba ajak basis nung ayoktsü. Sen apur/tem/Guarantor/tem/ Gari /Sentsüh ajak / Reserve Price /e-Auction anogo aser mapang, EMD aser Bid Increase Amount ji tsü nglanglen shia lir:-

Sr No.	Name & address of the Borrower	Total Dues (in Lakhs)	Vehicle Make & Model Registration No.	Date & Time of e-Auction	1. Reserve Price 2. Earnest Money Deposit (EMD) 3. Bid Increase Amount	EMD deposit Account No. & IFSC Code Name of the Branch	Property Inspection Date & Time
1.	YUNGMEI KONYAK, DIMAPUR	7.29	Make: NISSAN MOTORS Model: MAGNITE MT XV Regd. No.: NL07CC6843	28.07.2026 Time: 12 pm to 4 pm	1. Rs. 3,90,000/- 2. Rs. 39,000/- 3. Rs. 10,000/-	A/c No.: 10170015181219 IFSC: BARB0DIMAPU	24.07.2026 Time: 10 am to 4 pm
2.	K KATHI CHISHI, DIMAPUR	24.83	Make: TOYOTA INDIA Model: HILUX HIGH MT Regd. No.: NL07CC0415	28.07.2026 Time: 12 pm to 4 pm	1. Rs. 20,10,000/- 2. Rs. 2,01,000/- 3. Rs. 10,000/-	A/c No.: 10170015181219 IFSC: BARB0DIMAPU	24.07.2026 Time: 10 am to 4 pm

Iba sale dak sendakba nung telatetbatem metettsü atema website link <https://baanknet.com> nung repringang. Bid asütsü tejangrartemi
Mobile No.: 8119922922 ajanga Branch tekolak den tongteprateptsü akok.
* Bank telatetba nung aliba ama GST alitsü.
Date: 26.06.2026, Place: Dimapur
Branch Head, Bank of Baroda



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 27, 2026

Naga civilian 6 nem temeten agütsütsüla

- P Tiamongba Aier

Kuki-Zo nungeri May 13, 2026 nü Kangpokpi district kübok Leilon Vaiphei yimtsüng nungi pur aoba Naga civilian 6 tepset ta Kuki Zo Council Chairman Henlianthang Thanglet-i nangzükba ajanga Manipur nung kin o kin mepetmesü nung tetsükdaktsü aser tebilemtsü tulu ka bentsür aruogo. Telungpur teloktemi parnok özüng agi alenbanga mali ta bilemba agi ibala mapa inyaker aser tongtipangsa Manipur nung Kuki-Zo teloktemi telungpurtem ototia pusema nungitba agi telungpurtemi temulung ulua iba mapa inyakogo. Anungji Kuki Zo Council-i iba tatok meshiba yagi meperir aser iba nung metembangtsüla. Kangpokpi nung Thadou arogo lennir asem tepsetba sülen tejashi nung Naga aser Kuki teloktemi civilian tem apu. Ajisüaka Naga teloktemibo parnoki pur aoba Kuki nunger ajak chiok saka Kuki teloktemi pur aoba Naga civilian trokbo tasümang dang angu. Kuki Inpi, Manipur-ibo Naga nunger pur aoba ajak chiokogo ta ashi saka ibaji tang KZC Chairman-i Kuki teloktemi tepset ta tenüng agia tatok meshiba den khenyongi meputep lir. Iba ya parnok tsüngda tongtepratep junga masüba ama mezüngshitsüla kechiyong pur aor ajak chiok süra Naga civilian trok kodaser tepseter lia angu ta tasüngdangba arur. Kuki lennirtemi iba ya meteta liasü süra kechiba public dangbo osang tai sangoktsü. Parnoki memetet süra Naga nunger civilian tem shirnoki apu aser shir bangdak kübok ayu? Item tasüngdangba atema telangzübatem ya bushisüngdangertemi jungjunga bushitetsüla. Henlianthang Thanglet-i tatok meshiba ya lokti atema tapet asütsü akok saka tatok meshiba ajanga temeten agütsür ama mezüngshitaüla. United Naga Council aser Naga nunger telok aikati Kuki telungpur teloktem den Suspension of Operations agreement agientsü akhangba ya tenoktenoka agitsüla. Kechiyong Manipur nung item teloki tashiyim mapa inyaker aser özüng metsübur. Özüng alema inyaksangshi ajemtsü, telungpurtem inyaksangshi nung tenük yoka reprangtsü aser yimtenren olemtep lenmang sademtsü atema SoO framework ya latetba lir. Ajisüaka, item inyakyim lateta yur civilian tem odang pur oa tepsetra telungpur teloktemi ground rules shitak benshir asü, designated camps nung tenük yoka repranger asü aser telungpurtem talenba kecha melii senzusenbonger asü ta sorkari khen junga asadangtsü mapang ka ajurua lir. Külen, civil society organizations (CSOs)-i shilem agiba nunga tenük yoktsüla. Mangatettep aliba tensa ka nung civil society ajanga public süngjemdaktsütsü mesüra ronga atudaktsütsü inyakteter. Civil society organizations (CSOs) ajanga ketdangsürtem den yaritepa aibelenertem maitsü jangjatsü akok mesüra telungpurtem kümzüka ayutsü koka lir. Indigenous Tribal Leaders' Forum aser tanga Kuki teloktemi par nisungtem timtemba indang jembitsü temeten lir. Ajisüaka, Manipur nung Kuki nunger dang masü saka Naga, Meitei aser tanga kintem indang yimtsüng aika kasa tetsübu, lendong aser timtem nung lir. Anungji kin kati timtem ajuruba tenüng amer tanga kin nungi civilian tem tepsetba atema metena mejembitsüla. Centre aser state sorkartemi mapang züngzüker Naga civilian trok pur aoba aser tepsetba bushisüngdang asütsüla. Parnok pur aoba nisungtem aser telungpur teloktem maitsü jangjatsüla. Parnok pur aoba mapang nungi parnok mang anguba mapang tashi jungjunga kulitem bushitsüla. Iba maparen nung SoO framework kübok adenba telok kari dang shilem agiba jangjatsüla. Naga civilian trok tepsetba ajanga Manipur nung temelenshi tajung ka bener arutsüla. Iba tatalokba ajanga kuli tejangja bendena bushisüngdang asütsü, aibelenertem aputsü, okadak ken o benoka angadangtsü inyakyim shitak tenzüktsüla. Iba tatalokba ajanga yimjung tenangzüktep aika agiaka civilian tem kümzüka meyutetba meyipa reprangshitsüla. Leilon Vaiphei nungi pur aoba aser Kharam Vaiphei anasa tasümang anguba nisung trok ya civilian tem liasü. Anungji kin kati akhanger ta asüba agi masü saka özüngi akhanger ta asüba tangatetba nung sorkari teinyaktsü tim inyaksüla aser temeten agütsütsüla.

OLEMSABANG

Ao oshi nung 'metaphor' aser 'simile' amshiyim

Ms. Toshisangla, Asst. Professor FAC

(Yashi adok nungi...)

3. Visual Metaphor (Noksa agi Sayuba):

Noksa mesüra tamaittsü kar sayuba ajanga terepranger nem angatetdaktsüba dang noksa agi sayuba metaphor (visual metaphor) ta ajar. Iba ya teimba ka film, art aser advertisement nung amshir.

Tat: (a) Milendong jagi tesangwa bener aruba sayur.

(b) Posü jagi yimjung sayur.

(c) Süngdong tila jagi ainba sayur.

(d) San chanu jagi Yisu Khrista tamaittsü sayur.

4. Extended or Sustained Metaphor (Moraloka aoba):

Sangro mesüra otsüolem nung oset mesüra nisung balala ana tsüngta medemdanga oren mesüra pongtem nung amshiyonga aser amshiloka aoba dang extended metaphor ta ajar. Tat: T. Senka Ao-i züluba 'Taküm Tzütok' sangro nung yamai shia angutsü.

" Ayongküm Tzütok ama, kü rishi mangkonang dang". Pai pa takümjitzütok ka den medemdanger. Iba tzütokji arishi kanga tatsü, oda mongpu ka dang ta ashir aser sangro tarensena alu dang pa taküm tatembang kati arubaji tzütok rarema akümba den medemdanger.

T. Senka Ao-isa züluba sangro " Senso Atsüki" mezüngbuba tejong nung yamai zülua angur. "Kibongji atsüki ka lir". Pai kibong kaji atsüki den medemdanger aser tanabuba tejong nung yamai shia angur. "Par atsükiji tsürabur". Iba taren ajanga sangro züluri 'kibong', 'tsürabur' aser 'atsüki' item tesentaktepji medemdanga züluba angur.

O Tembang

Ao oshi ya metaphor aser Simile amshiyim nung kanga takar ta bushiteter. Kechiba süra Ao oshi nung anapronglaji tensa balala nung kanga peta amshiba angur. Iba tebushiba ya ajanga Ao oshi tarokba nung angatettsü aser samaya aliba ojangtem aser item amshiyim rizünga ayutsü tasatem metettsü. Ao nung amshibatem English nung amshiba den medemdanga bushitsü tongtibang ta angateter. Iba den tarutsü nunga iba shisaluyim nung maneni bushiloka aotsü teimla lir ta apiteter.

MEDEMDANGBA KAKETTEM (Bibliography):

Ao, T.Senka. "Teronom Taku" (Tribal Development and Communication Centre Mkg) 2017.

Ao, T.Senka. " Süngti Berem" (Tribal Development and Communication Centre Mkg) 2018.

ASLB. " ArokOsep" Kohima: NV Press, 2019.

Ao, T. Senka. " Ao Oshi Tensenyim" (ASLB Publication) 2022.

TEZÜLUR INDANG:

Wt. Toshisangla ya Longsa tsür aser la ya Fazl Ali College, Mokokchung nung Ao sayur. Iba onük ya lai July 31st, 2024 nü FAC nung 'One Day International Conference on Language, Literature and Oral Tradition of the Ao-Nagas' (Aor Oshi, Kenozülu aser Mulungzüng Sobaliru onük nung kenü ali kintem mungdang sentong) nung jembiba ka lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Mumbai nung Khristantemi Tenla ki ka meraksatsütsü mepishir



Mumbai kübok Thane nung Aso 17buba mapang Portuguese nunger missionary temi asüba Tenla kidang Khristantem tekülem sentong nung tangokba noksa nung angur.

June 26, 2026: Mumbai nung akhidang Portuguese nunger missionary temi asüba Tenla ki ka anasa gari lenmang tasen atema ali atuba agi Khristantemi tebilemtsü kaa ketdangsertem dang iba nüngo kiojen wazüka ayutsüla, ta metetdaksü.

Mumbai kübok Thane nung aliba Tenla kiji Aso 17buba mapang nung asüba lir, ajisüaka iba Tenla ki anasa Thane coastal road project kübok ali atuba ajanga iba Tenla ki kongshitsüsa lir, ta Arogo nung lenirtemi metetdaksü.

June 23 nü osangbenertem den jembidang iba Arogo nung putir, Calisto Fernandes-i, iba Tenla kidang nungi metre 20 shi dang pilar gol tulu amshia ali tudar, ta metetdaksü.

Paisa, iba Tenla ki ya 1630 küm Portuguese Franciscan missionary temi asü, ta ashi.

"Iba ama akhi kiojen wazüka ayutsü atema parnoki iba project asoshiji tanga tesem ka dang shimtsü koka liasü," ta pai metetdaksü.

Iba project atema hire asüba private construction company jagisa, Khristantem tenem

kolaki atuba lenmang jenjang (steps) 220 nungjagi tesadang kabo raksatsü ta ashi, ta Fernandes-isa metetdaksü.

Taoba ita iba company jagi Arogo nung lenirtem dang shidi ka ajanga, "Iba project ajanga 'steps'-a amshitsü, anungji ibaji raksatsütsüsa akümtsü," ta metetdakja liasü.

Fernandes-isa, item steps ya India-Portuguese heritage kübok wazüka lir, ta ashi.

Company jagisa, steps raksatsüba ajanga Arogo nung züngsemtem oli-ora mekongshitsü atema parnoki khenpiga atema lenmang ka yanglutsütsü aser tesülen Foot Over Bridge (FOB) lenmang yangluja Arogo nem bendanga agütsütsü, ta metetdakja liasü.

Ano külen Association of Concerned Christians (AOCC)-ia, iba ama akhidang asüba Tenla ki ka raksatsüra ibaji region nung sobaliba aser yimsü dak sendakba nüngshi kiojen ka raksatsür asütsü, ta metetdaksü.

June 23 nü osangbenertem den jembidang AOCC General Secretary, Melwyn Fernandes-

i, "Putu aika tamangertemi steps 220 ji tua tenem kolak nung sarasadema arur, aser iba ama lenmang ya wazüka ayutsüla," ta metetdaksü.

June 23 nü Mumbai nung aliba Watchdog Foundation-i shidi ka ajanga Archaeological Survey of India (ASI) aser Thane Collector dang Tenla ki anasa ali atuba ashishia metetdaksü.

"Gol tulu amshia ali atuba ajanga ali atashitsür, ali raksatsür aser ali tashi meiti kümdaksür. Ibaji ajanga Tenla ki tamendakdak aser Tenla ki raksatsütsüa akok," ta Foundation nung trustee, Godfrey Pimenta-i metetdaksü.

Pimenta-isa, "Onoki ASI aser district ketdangsertem dang tangsa iba tesemji semdanga 'conservation' mongintem nem asadangdakjang, temelaba agütsüba reprangshiang aser nüngdak dang süra technical evaluation atema tang teinyakdak mapaji anena lidakjang ta mepishiogo," ta metetdaksü.

CBCI-i June 28 nü FCRA atema sarasademtsü ayonger



June 26, 2026: Catholic Bishops' Conference of India (CBCI)-i India tesem ajaklen Arogotem dang Foreign Contribution Regulation Act (FCRA) ozüng tasenba atema sarasademdaksüner, ta metetdaksüogo.

Tzüngluruwa mongpu Parliament nung FCRA Amendment Bill benoka o lemteptsü tebilemba lir. Arogo nung lenirtemi, FCRA ozüng

yanglushiba ajanga mission mapa inyakra Khristan organisations aika kongshitsü, ta metetdaksü.

India tesem balala nung Khristan missionary tem aser organizations-i shisaliok, healthcare, social welfare aser charity mapa jenti inyaker, ajisüaka FCRA ozüng tasenba kübok Khristan melungtet teloktemi bendanglen nungi senotsü teyari mengura item

mission mapa aika meinyaktetsü, ta shisabulua bilemer.

Taoba hopta CBCI Tir, Cardinal Anthony Poola-i, akhidang nungi India nung Arogoi sensakertem tenzüka arur, ta metetdaksü.

CBCI-isa Arogotem dang June 28 nü FCRA atema temeja sarasadem agitsü metetdaksü.

Foreign Contribution (Regulation) Amendment Bill, 2026 ya mezüng taküm March 25 nü Lok Sabha nung benoka liasü.

Iba Bill ya agizükra bendanglen nungi senotsü teyari anguba melungtet teloktem aser charities aika kongshitsü.

Tesüba küm 10 tsünga Union Ministry of Home Affairs (MHA)-i melungtet telok 20,693 indang FCRA license thinentsüogo aser item melungtet teloktem rongnung Khristan organizations-a aika densema lir.

ANO GO ABEN TSÜNGREM DEN

Tamang Ajanga Jajaba

"Anungji nenoki kechi koda Kibuba Khrista Yisu agizük, yamaji pa dak tera yanga aser metenloktepa..... tenüsang kanga agüja pa den jajaang" (Kol. 2:6,7)

Khristan kari tamang ajanga jajaba tetezü telunglen miim tamang yur jajabaji lir ta amanger saka tamang jajaji iba dang tali mapa agi sayur. Tamang ajanga jajaba tetezü nai amangba anogo shia mapa agi sayuba lir. Nai amangba yimya jagi ne libaliro bentettsü. Ne tsütsü nai amangba reprangshiang kechiaser ne libaliro yimyaji nai amangba nungi adoker.

"Saka ni shitakba kechi amanger aji koda mettetsü ?" ta nai asüngdangtsü akok. Item ya shisadangang :

Ni tamang agi inyakra ni tali akoktsü

Ni tamang agi tenzükra ni tali tetezü akatsü

Ni tamang agi inyakra ni tali ajangzüksü

Ni tamang agi inyakra ni tali temulung asütsü

Ni tamang agi inyakra ni tali tepelaba asütsü


Ni tamang agi inyakra ni tali tenzüksü,

Ni tamang agi inyakra ni tali süneptsü.

Ne tamang nüngdaktem (Chiyungtsü, jenokdak, tekümsük) nguogo ta asüba, tepela, jenokdak aser tesünep angutsü ta amangba atalokogo ta ne taküm ajungmesotsü. Item ya Tsüngremi kechi ashi iba den sendaktepa melira, ne tamang jajaba aser amangba külemi anenadoktsü.

Iba, ne o angatetba nung tanü ni aintsü yariang, idangji kü tamang jajaba tashi itshitsü.

Sudan kübok Kauda nung putir Youhana Al-Amin khaset



June 26, 2026: Sudan kübok Kauda nung kiralongrar telok kati Arogo indang medical supplies agitsü nükjidong nung putir ka khaset.

June 18, 2026 nü kiralongrar telok ka arua putir Youhana Al-Amin dang medical supplies rizünga aliba jabi agüjang ta takhangba agüja liasü. Iba sülen parnoki akokba tashi medical supplies ji bener ao aser tanüngbaji abeni arutsü tebilemba liasü.

Putir Al-Amin-i ketdangsertem nem iba osangji metetdaksü aser tanüngba medical supplies ji tanga tesem ka nung miima ayutsü lemteta liasü.

Anogo ka dang lirbo anepdang 10:00 ako nung kiralongrartemji tanüngba medical supplies abeni arua parnoki putir khaset aser security sepai ka injang agi yiruja liasü.

Hopta trok tejaklen-a Nuba tenemlen aliba nisung aika khaseta liasü. Security sepaitem ishiba dang akümer saka tensabo tamajungba dang akümba ajanga Khristan lenirtem aikati iba tesem toktsür ogo, ajisüaka Al-Amin-ibo iba tesem toktsür moui maneni santem reprangtsü telemtetba agia liasü.

Khristan kati, "Youhana aser takoksa angurtem dang Tsüngremi taochi sayuang ta onoki sarasademtsür aser parnok kibongtem, Arogo nung züngsemtem aser iba tatalokba ajanga kongshirtem ajak asoshi sarasademtsür," ta metetdaksü.

Pastor Amin junga meteta alisang, putir John Gbemboyo Joseph Mbikoyezu-i Sudan aser South Sudan nung rara anentsü aser tensa tajungba akümtsü atema ajak nem sarasademdaksüner, ta mepishia metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Yimtsüyimbu

- (n) yimtak taintem, tantsü tambu, tebu tedi (senior citizen in a village)
* Yimtak yimtsüyimbu nungi lanurtem shisatsü agia alitsüla.

Yimya

- (n) jaklaliru, libaliru (character, manner)
* Taintemi tanurtem dang yimya tajung sayutsüla.

OLONG PAITEP # 7547

						1		2		3
4										
								5		
6		7								
								8		
		9								
				10						
11										
			12							
13										

TIPIEN

2. Mimong nung aliba - (3)
4. Meshiteta amongba - (8)
5. Ta_ _ _ - (3)
6. Rata - (7)
9. Azüngtsü maka aküm - (7)
10. Atidang - (7)
11. Tajemtsü tapu ka - (3)
12. Jazuk - (8)
13. Shi_ _ _ - (3)

LANGTSÜNGLEN

1. Mita ata - (4)
3. Tekolak teyong - (8)
6. Jiteta yanglu - (8)
7. Merang lisü - (4)
8. Yangsa ao - (4)
10. Len sayu - (4)

OLONG PAITEP # 7546 TELANGZÜBA

TIPIEN :

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola, 14. Kin.

NAI-A YA METETTER MA



Australia nunger Joseph McGrail-Bateup-i aliba otsü tasen ka ajatetogo aser ibaji ola tulutiba adokba lir.

Joseph ya air conditioner cleaner aser honorary town crier ka lir aser pai 122.4 decibels tashi "now" ola adoka liasü. Iba ola tasazük ya tsüngmok atenba, chainsaw mesüra pneumatic drill den saku lir.

Arishi küm 58 tain Joseph-i iba otsü ajatettsü atema tenetben meranga aru aser tatamsa Northern Ireland tesayur Annalisa Flanagan-i 1994 nung 121.7 decibels tashi ola adokba ajatetogo.

GOVERNMENT OF NAGALAND

DIRECTORATE OF SCHOOL EDUCATION

KOHIMA:NAGALAND.

NOTIFICATION

Dated Kohima the 24th June 2026

NO. ED/PLN/GT-SR.L/24 :: In continuation of this Department's Notification dated 20th March 2025 and in pursuance of Government **Letter No. DSE/SL/2 60/2021 (Vol I)/3111 dated 13th May 2026**, whereby it has been directed that all columns/entries in the Tentative Seniority List of Graduate Teachers 2025 be minutely verified and validated.

All Graduate Teachers appearing in the Tentative Seniority List 2025 (available at <https://education.nagaland.gov.in>) from **Sl.No 1-750** are hereby informed to report mandatorily to the Directorate of School Education, Planning Section (**Room no 421**), as per the schedule indicated below for physical verification of documents.

Sl. No.	Date	Sl. No in the Seniority List.	Time
1	14-07-2026	1-100	11 AM to 4:30 PM
2	15-07-2026	101-200	11 AM to 4:30 PM
3	16-07-2026	201-300	11 AM to 4:30 PM
4	17-07-2026	301-400	11 AM to 4:30 PM
5	20-07-2026	401-500	11 AM to 4:30 PM
6	21-07-2026	501-600	11 AM to 4:30 PM
7	22-07-2026	601-700	11 AM to 4:30 PM
8	23-07-2026	701-750	11 AM to 4:30 PM

The concerned teachers shall produce the following original documents along with one set of photocopies during the verification;

1. First Appointment Order
2. Regularization Order
3. Service Confirmation Order
4. Educational Qualification Certificates and Mark Sheets from HSLC onwards.
5. Order granting Graduate Teacher Scale (in respect of late GTs)
6. Professional Qualification Certificate(s) (B.Ed/M.Ed)
7. Permission Order issued by the Directorate for undergoing B.Ed/M.Ed course(s).
8. ST/BT/Indigenous Certificate
9. Updated Service Book

Failure to appear for verification and produce the requisite documents within the stipulated period shall render the concerned teacher ineligible for promotion, and no claim whatsoever in this regard shall be entertained thereafter.

(SHASHANK PRATAP SINGH) IAS
Principal Director

Chakma nunger alidak voters 121% teimba kümogo: MZP

Aizawl, June 26, 2026

(Agencies): Mizoram nung tang tagidak Special Intensive Revision (SIR) nung özüng alema bendangterem aruba jungjunga bushitsüla ta Mizo Zirlai Pawl (MZP)-i takhangba agütsüogo.

2005 nungi Chakma nunger teimba ser aliba tesemtem nung yimtsüng tasen 97 tentetogo aser voters 121.7% talila kümogo ta MZP-i ashir.

"Onoki 2005 electoral rolls den 2024 lists medemdanga independent analysis ka süogo. Özüng alema arurtem tebilemtsü aliba constituency tem onoki jungjunga asadangogo" ta MZP president C. Lalremruata-i ashi.

Yimtsüng 195 nung 2005 nung özüng alema nisung 43,540

aru aser 2024 nungbo 96,531 aru. 2005 aser 2024 electoral rolls nung aliba yimtsüng 98 nung voters 31.15% teimba liasü, 2005 rolls nung yimtsüng 97 maliasü saka 2024 lists nungbo voters 39,428 aliba sayua lir ta MZP-isa metetdaksü.

Ano electoral rolls nung dual Indian aser Bangladeshi citizenship alirtem aser house numbers tejangja melii voter entries asüba bushitetogo ta parnokisa ashi.

Onoki Chief Electoral Officer dang yimtsüng 195 indang osang tejangja meshitsü ta MZP president Lalremruata-isa ashi.

Parnokisa election kettangsürtem aser booth-level officers dang electoral rolls nung

özüng alema züluoka alirtem agentsü ayongzükogo.

1995 SIR exercise nung MZP züngsemtemi election kettangsürtem den yaritep aser iba ajanga Bangladeshi immigrants 10,000 tema voter list nungi agiena liasü ta Lalremruata-isa shisem.

"Tripura nung SIR exercise tang tagidak lir aser June 28 tashi nung tembangtsü imlar" ta Joint Chief Electoral Officer Ethel Rothangpui-i ashi.

2005 SIR nung family records mengutetertem electoral rolls nungi teti atema züngdoksü. Iba indang draft rolls July 4 nung sayatsü aser July 5 nungi August 4 tashi claims aser objections atema mapang agütsütsü ta laisa ashi.

Changlang district police tsüngdang NSCN züngsem 3 temai adok



Dibrugarh, June 26, 2026

(Agencies): Arunachal Pradesh nung Naga nunger telungpur züngsem asemi Changlang district police tsüngdang temai adokogo.

Temai adokertem ya National Socialist Council of Nagaland-Reformation (NSCN-R) züngsem ana aser National Socialist Council of Nagalim (NSCN-IM) züngsem ka lir.

Parnok ya Jongham Saijong (43), Lomjan Pangtha (51) aser Khangjung Khanglim (22) nunger ta jangjaogo.

Security agencies-i counseling asüba den

kinungertemi ajungshiba ajanga par asemi temai adoktsü mulungtet ta police-i ashi.

Arunachal Pradesh kübok Tirap, Longding aser Changlang district tem nung mapang talangka telungpur maparen inyaka arur aser security forces-i counter-insurgency operations tuluba inyaka aruba ajanga telungpurtem temai adokogo.

Assam Rifles aser state police külemi yaritepa telungpurtem rehabilitation aser reintegration maparen inyaker.

Telungpurtem temai adokba pelashishia agizüker aser iba ajanga state nung yimjung

akangshitsü ta Arunachal Pradesh Cabinet Minister Mama Natung-ia ashi.

"Changlang district police ajanga counselling aser rehabilitation maparen inyakba den telungpur kibongtemi nungita yariba ajanga parnoki özüng alema inyaksangshi melena yimjung shimtetogo" ta pai ashi.

Changlang district nung NSCN züngsem asem temai adokba ya asen state nung yimjung akangshiba aser tensa tajungba akümba nung mera tajung ka lir ta Mama Natung-isa metetdaksü.



GOVERNMENT OF NAGALAND

DIRECTORATE OF HIGHER EDUCATION

NAGALAND, KOHIMA

www.highereducation.nagaland.gov.in

dir.highedu@gmail.com



NO.HED/SCHO/MISC/36/2025/

Kohima, dated the June 2026

Timeline for opening and closing of National ScholarshipPortal (NSP) for Post Matric Scholarship (PMS-ST) to ST students of Nagaland and Common Scholarship Portal (CSP) for State Merit & Research Scholarship, Academic Session 2026-27.

This is to inform all the Educational Institutions and Students that the timeline for the Academic Session 2026-27 in respect of the CSS-Post Matric Scholarship (PMS-ST) for the ST students of Nagaland via the National Scholarship Portal (NSP) i.e., <https://scholarships.gov.in> and the State Merit & Research Scholarship via the Common Scholarship Portal (CSP) i.e., <https://scholarship.nagaland.gov.in> is to be followed as: -

FOR POST MATRIC SCHOLARSHIP (PMS ST)

PROCESS	FRESH/RENEWAL
Registration for the Students	1st July 2026 till 30th September 2026
Completion of verification by the Institutions	31st October 2026
Correction of defective applications	
by the Students & the Institutes	15th November 2026
Completion of verification by the State	30th November 2026

FOR STATE MERIT & RESEARCH SCHOLARSHIP

PROCESS	FRESH/RENEWAL
Registration & Application	
submission for the students	1st July 2026 till 30th September 2026
Completion of verification by the Institutions	31st October 2026

Sd/-
Director
Higher Education
Nagaland: Kohima

OFFICE OF THE

TAMANG SEMCHIR TELONGJEM DIMAPUR

MEYIPTSÜR

Ao Milen adok 8th may, 2026. Aoer Jamir Mungdang office ajanga Mosem chir asem (3) ta sangdongbaji khukhua aitsür.

Mosem chir parnok pungo (5) Lumongdong, Mongka, Metsubo, Wacha aser Tamang ta metetdaksür.

Tali jangjanüra Tamang semchir dang arua asüngdangang.

Tamang semchirtem tenüng nung ;

Sl.no	Name	Village	Signature
1.	TYANGER JAMIR	CHUCHUYIMLANG	
2.	LIPOKYANGER JAMIR	UNGER	
3.	NUKSHI JAMIR	MULUNGYIMSEN	
4.	MANGYANG JAMIR	MULUNGKIMONG	

Sd/-
OPANG JAMIR
PRESIDENT, KOHIMA

Sd/-
W. MATSUNG JAMIR
PRESIDENT, DIMAPUR

Venezuela menoknok nung asür nisung 235 jungogo

Caracas, Aami/June 26 (Agencies): Venezuela linük yimtiba anasa menoknok tesashi anaben anokba sülen rescuers temi nisung takum aliba kumzüksü meranger, kong nisung 235 süogo aser 4,300 shi yirua lir.

Caracas aser anasa tzükum nung aliba La Guaira yimti nung nüburtemi ki chirepba aliba telung nungi teyari meshia ayimtenba angashia liasü.

Mezüngbuba menoknok ya magnitude 7.2 anok aser tanaben ya tesashiba 7.5 magnitude anoka liasü, ta US Geological Survey (USGS) ajanga ashir, aser anaprong ali tema anasa anokba ajanga ki o jen tali raksatsü.

Ano nisung aika sür alitsü südi ta tsüboteper aser aika talidak ki maka mesüra ki teraksa nung alitsü tetsübo nung yimtong nung mejanga liasü.

Menoknok ya Bodhbar nikongdang 6:04 ako nung anok, koba Venezuela nung national holiday liasü, anungji nisung timba kidang liasü.

Mezüngbuba menoknok ya ali tema nungi kilometer 20.3 lur anok aser tanabuba ya kilometer 10 lur anok, ta USGS ajanga ashir.

Venezuela National Assembly tir Jorge Rodríguez-i nisung asüba tali kumogo ta Brehostibarnü ashi aser linük indang interim President Delcy Rodríguez-i state of emergency sangdonga lir.

Linük balalai yariteptsü nangzükogo aser US-isen \$150 million agütsütsü nangzük. Search and rescue teams yaritsü atema US mitkari transport ships aser aircraft yoker, ta sangdong ka nung ashi.

Ki tulu 250 raksago mesüra samaogo, timba La Guaira nung lir, ta Jorge Rodríguez-i ashi.

Linük yimtiba nunga ki chirep aser Trujillo, Yaracuy, Carabobo, Aragua aser Miranda nunga kongshi, ta Interior Minister Diosdado Cabello-i ashi.

Caracas indang greater metropolitan area nung shilem ka ama Chacao indang Mayor Gustavo Duque-i ki ka nung nisung 11 asü aser 23 kumzük ta ashi.

Social media nung video ka pai lemsatepba nung ketdangsür temi ki chirepa aliba telung nung nisung takum alitsü teimla nung süng-long arangdoker.

"Onoki akok tashi nisung takum aika kumzüksü meranger," ta pai ashi.

Caracas tezülen Venezuela indang airport tongtiba, Maiquetía kanga sashia raksar shibanga lir, ta interim president-i ashi.

Caracas northwest tsütsü kilometer 250 shi pilar Tucacas tzükum nung storey aika atongtepa aliba ki ka chirepba video ka sayua liasü.

Menoknok anaben anokba sülen aftershocks ya 30 ben shi liasü, ta Delcy Rodríguez-i ashi.

Caracas nung Altamira aser Los Palos Grandes kiyong nung tesashiba kongshi, ta Cabello-i ashi.

Caracas indang greater

North Korea-i nok-nü tendangba sentong tuluka ayongzük

Seoul, Aami/June 26 (Agencies): North Korea-i par mitkar tashi ulushia South Korea den tensa mejungi aliba mapang par linük south tsütsü arütsü akangshiba nung shilem ka ama nok-nü tendangba sentong tuluka agia liasü.

Mongulbarnü North Korea lenir Kim Jong Un-i repranga lia tendanger par linük dang "deadly and destructive offensive posture," yimya sübatsü ashiba sülen Hokulbarnü Seoul-ia "drone warriors" indang army yanglutar ta ashi.

Kim-i par mitkartem dang par linük tsükchirtem anisüngzük malitsü aser tetsübo nung alitsüsa aser amaktsü tsübotsüsa alitsü shia liasü.

Nok-nü tendangba nung "special mission" ballistic missile warhead dena liasü, koba rocket launcher tajungba kuma yanglushiba lir, koba firing range talangba aser self-propelled gun-howitzer ka dena lir.

North Korea news agency KCNA ajanga ashiba agi iba warhead yagi tsükchir indang airfields, rongnendak aser power facilities densema tongtipang targets tem kanga sashia raksatsütsü nükjidong nung lir.

Pyongyang-i nok-nü sentongtem nung "ultra precision" aser long-range tashi bushir, ta Kim-i ashi.

Iba ya ajanga North Korea-i south tsütsü arütsülen 'firing capabilities' nung terenlok aliba sayur, ta pai ashi.

Iba yagi South ajunga nung amaktsü North Korea nem tashi agütsütsü nükjidong nung lir ta asadangteter.

South Korea nung United States indang military bases aika lir, kong sepai 28,500 shi lir.

(Maneni tapak 8 nung...)

UN-i Strait of Hormuz nungi rong anitettsü sentong soitaatar

Dubai, Aami/June 26 (Agencies): UN indang International Maritime Organization (IMO) ajanga Strait of Hormuz nung rong nung senzür nisung 11,000 dak tema madokteti aliba anitettsü sentong aliba yangji khu abenba rong ka ajanga aodang amakba sülen iba sentong soitaatar.

IMO chief Arsenio Dominguez-i ashiba agi, rong tila aika iba tesem nungi anitetogo, saka "necessary safety guarantees" alitsü nüngdaker.

British maritime security agency UKMTO-i Brehostibarnü ashiba agi, Oman rongnendak Dahit nungi southeast tsütsü 7.5 nautical miles shi pilar rong ka dak mejangjaba "projectile" agi amak.

Nisung asü-amaba osang mali.

Iran indang Islamic Revolutionary Guard Corps (IRGC)-i, strait nung IMO ajanga latettsüba lenmang ajangtsü merangba magizüksü aser lendong lir, ta tekumdangtsü ashi aser rong tem Iran den amalitep akatsüla ta shia liasü.

Iran-i rong dak akha ta US ketdangsürtemi ashir, ta US media osang ajanga ashir.

Maritime risk management firm Vanguard-i ashiba agi, Singapore nisan songa aliba Ever Lovely rong ya amakba sülena strait ajanga maneni aor.

Ever Lovely ya IMO-i jangjateta aliba southern lenmang ka nung Breshostibarnep jaja aliba indang ship-tracking website MarineTraffic nungi data ka nung sayua liasü.

Iba rong ya tanga rong pezü anir lir, ta Wall Street Journal ajanga ashi.

Iranian navy temi rong tem den radio nung tekumdangtsü kecha mashi, ta item rong nung alir temi osang kaket dang ashi.

Amakba rong ya IMO indang evacuation framework kübok jaja meliasü, ta IMO chief Dominguez-i Brehostibarnü sangdong ka nung ashi.

"Tzüyim nung senzürtem kumzüka ayutsü ya tongtipangtiba lir ta ni teti jembir.

Anungji tangatettep kati arutsü aser navigational safety mechi tarutsü nung osang tejangja mongutet tashi evacuation sentong anena atar," ta pai ashi.

US aser Israel nati Iran den raraba mechi February ita nungi rong noklang aika aser rong nung senzür nisung meyerijang aika Gulf nungi madokteti anendaka lir.

Strait tanaben lapokba sülen UN-i yangji aliba rong tem anir adoktsü merangba sentong Mongulbarnü sangdonga liasü aser iba "large-scale operation" nungya Iran, Oman, US aser region nung tzükumlen aliba linüktem angatettepa inyaker ta Dominguez-i ashi.

Strait ketdangsütsü asoshi Iran-i tentetba telok kati, lazükja aliba lenmang alema oa senzüba rong tem kumzüka ayutsü meshitettsü, ta ashiba sülen iba rong dak amak.

"Temelaba agüja maliba lenmangtem amshiba nungi timtem ajurura, rong kibur, amshir aser anishir tem khuret asütsü," ta Persian Gulf Strait Authority (PGSA) ajanga X nung post asü.

Rong aika strait indang south tsütsü lenmang tanga ka amshia arur, koba Oman indang tzükumlen alitsü, ta New York Times ajanga ashir.

Taoba hopta US aser Iran nati 14-point deal ka kübok tsükchitep tembangtsü züngzüktep - kong Iran dang anogo 60 asoshi taa memeshi shishilempaba rong tem timtem majurui ajangdaksütsü shia lir.

Ajisüaka Tehran-i iba strait ajangba atema 'maritime service fees' meshitsü sentong lir ta aiben shiogo.

Iba sentong ya US-i khenyongi memulunger aser Mongulbarnü Secretary of State Marco Rubio-i Strait of Hormuz nung linük kata nema tolls memeshidaksütsü, koba international tzi lenmang lir, ta ashi.

Rubio ya tang Bharain nung lir, koba Tehran den tezüngzüktep yanglua aliba jembitsü asoshi Gulf linüktem sema jajaba mapang lir.

US aser Israel nati February ita tatemlen nungi Iran dak amak tenzükba sülen Tehran-i strait ya shibang - koba totzü aser gas abenba lenmang tongtipang ka lir - aser alima nung totzü jenjang tali kumdaksü.

Ajisüaka June 17 nü US aser Iran tsüngta Memorandum of Understanding (MOU) ka zülutepba sülen totzü tazü jenjang kanga ajema kumtar.

FIFA WC 2026: Ivory Coast, Ecuador, Netherlands & Turkey takok angu



FIFA WC 2026 : Ecuador team

Philadelphia, Aami/June 26 (Agencies): Ivory Coast nungi Nicolas Pepe-i goal ana agütsüteta Brehostibarnü Curacao madak 2-0 agi takok ngua Group E nung tanabuba jenjang tongteta World Cup knockout phase-i tang mezüngbuba yiogo.

Iba asayamung nungi tsüker rongnung Curacao ya team ti buba akum.

Ivory Coast ya Mongulbarnü Arlington, Texas nung Group I nungi tanabuba jenjang nung aliba team (France mesüra Norway) den asayatsü.

Pepe yagi World Cup qualifiers pongu nung goal kata magütsütet aser manager Emerse Fae-i tawa African Cup of Nations squad nunga

maden.

Saka pai goal anaprong yokteta knockout stage tongtetogo.

Kasa mapang East Rutherford, New Jersey nung Group E nungi Ecuador-i Germany madak 2-1 agi koka last 32 atema qualify süogo.

South America nungeri asaya ka nung takok angutsü mesüra sayatenya ka nüngdaka liasü aser mezüng yongi qualify sür aliba Germany telok nungi Leroy Sane-i asaya tenzüker minute ana buba nung goal ka agüja parnok teimla sama.

Ajisüaka iba asayamung nung goal kata magütsüteti aliba Ecuador nungi Nilson Angulo-i minute 9 buba nung mezüng goal agütsü aser asaya tembangtsü

minute 13 anünga lia Gonzalo Plata-i tanabuba goal agütsüteta liasü.

Germany ya points trok bener par telok nung winners ama knockout stage atema qualify süogo, aser Ecuador ya 'best eight third-placed teams' nungi ka ama qualify asü.

Kasa anogo Kansas City nung Group F nungi Netherlands-i Tunisia madak 3-1 agi takok nguteta round of 32 nung Morocco den asayatsü jangaogo.

Tzüngsang mejungi asaya tenzükaka minute trok tsüngta 2-0 agi par jenjang tajungba kumer liasü.

Tunisia captain Ellyes Skhiri-i aibelen par tsütsüi minute asem buba nung goal ka idaktsü

aser iba sülen Brian Brobbey-i iba asayamung nung pa asoshi goal asem buba agütsüteta liasü.

Tunisia nungi Hazem Mastouri-i minute 54 buba nung goal ka agütsü, saka Dutch nunger Jan Paul van Hecke-i minute 62 buba nung kepzüka liasü.

Tunisia ya iba asayamung mezüng asaya nung Sweden-i 5-1 agi akokba sülen par coach Sabri Lamouchi mapa nungi anentsü aser pa melen Herve Renard shim, ajisüaka pai tia memelentsüteti iba asayamung nungi tsükogo.

Kasa anogo Dallas nung Group F nungi Sweden aser Japan na asaya 1-1 draw nung tembang, saka telok anaprong knockout rounds tongogo. Japan nunger Daizen Maeda-i asaya tenzüker minute 56 buba nung goal ka agütsütet aser minute 62 buba nung Sweden nunger Anthony Elanga-i kepzüka liasü. Japan ya last 32 nung ponguben world champions Brazil den Hombarnü Houston nung asayatsü.

Sweden ya taoba asaya nung Netherlands-i 5-1 agi akok, saka parnoki asendenshir asayaba yong points pezü bener par telok nung tasembuba jenjang tongteta group 12 nungi 'best third-placed teams' tem rongnung ka akum.

Kasa mapang Group D nung Turkey nungi Kaan Ayhan-i asaya tatemlen goal ka agütsüteta United States madak 3-2 agi akok angu, koba parnok

asoshi iba asayamung nung mezüngbuba takok alitsü, aser asayamung ayonger United States yabo knockout round atema qualify süa lir.

Iba asaya nung America nunger Auston Trusty-i minute 3 buba nung goal ka agüja Los Angeles Stadium nung tereprangertem kanga pelatempa liasü.

Turkey-i meyiper minute 10 buba nung Arda Guler ajanga goal ka aser minute 31 buba nung Baris Yilmaz-ia goal ka agütsü. Halftime sülen Sebastian Berhalter-i minute 49 buba nung meta talang nungi goal ka yokteta liasü. Ajisüaka substitute Ayhan-i minute 90+8 buba nung goal tatembangba agütsüteta akok.

US ya Bodhbarnü Santa Clara nung Bosnia and Herzegovina den round of 32 asayatsü aliba nung rangloker aser Turkey kidangi meyipa aor.

Kasa mapang San Francisco Bay Area Stadium nung Group D nungi Australia aser Paraguay tsüngta asayaba nung goal kata magütsüteti asaya tembang, ajisüaka Australia ya round of 32 tongogo aser Paraguay ya teimla ka lir saka ano mejangjati lir.

Australia ya Group D nung United States sülen lir aser Dallas nung Group G nungi tanabuba jenjang nung aliba team den asayatsü, koba Hokulbarnü Egypt o Iran aser Belgium o New Zealand asayaba sülen jangjatsü.

US Open Super 300 nung Rounak Chauhan-i Chou Tien-Chen tsükdaktsü



Washington, Aami/June 26 (Agencies): Arishi küm 18 tain Rounak Chauhan-i pa lanuwa career nung takok tulutiba nguteta BWF US Open Super 300 indang Round of 16 nung

World No. 6 aser top seed Chou Tien-chen madak 21-17, 26-24 agi takok nguogo.

Iba asaya ya minute 49 nung tembang aser India nungba ya tang mezüngbuba Super 300

quarterfinal tongogo aser ibai top-10 opponent madak mezüngbuba takok anguba alitsü.

Iba takok ya asayamung nung taoksatsü tulutiba rongnung ka alitsü, aser Chauhan-i set anaprong nung aibelen kar liasü.

Mezüng game nung pa 15-17 agi tajemba jenjang nung liasü, saka final points ti kanga kera ngutet aser tanabuba set nunga 11-17 agi pa tajemba liasü saka taoba World Championships silver medallist madak takok angu.

India nungbai kanga temlung lema yimya balala nung asayateta liasü aser ibai straight-games nung takok anguba tajungtiba rongnung ka alitsü.

Chauhan ya tang World No. 80 nung lir aser BAI National Centre of Excellence nung training agia liasü aser junior level nung junga asayateta senior circuit nung ajemok. India nunger BWF World Junior Championships nung pa tasen ka lir aser aikati pa junga memeteti lir.

BENDANGLI OSANG : Tapak 7 nungi...

North Korea-i nok-nü tendangba sentong...

2019 küm US den jembishinüba nung terenlok makai anendakba sülen Pyongyang-i mitkar tashi ulushitsü meranger.

Hopta tetenzüklen Kim-i par navy tem nuclear weapons aser warships tuluba amshitsü aser iba ya ajanga "multifaceted and efficient" operations atema linük renemtsü ta shia liasü.

US-i yimjung ken o jembishinü tenzüksü merangba nung telangzüba agüja, par-i North Korea indang nuclear nok-nü raksa indoktsü akhangba anentsüla, ta Kim-i ashi.

North indang mitkar terenlok aliba ajanga South ya kümbang nung nokdaker ama lir aser US nungi teyari tali angutsü imlar.

Taoba hopta South Korea Tir Lee Jae Myung-i ashiba agi,

US Tir Donald Trump-i pa dang North Korea ken o nung temlung agütsütsü mapang tongogo ta ashi.

Hokulbarnü South Korean defence ministry-i, North nungi mitkar tsütsü tebilemtsü tali akumba mechi par drone tashi ulushitsü sentong lir, ta ashi.

Defence Minister Ahn Gyu-back-i ashiba agi, mitkari drones tem "personal firearms" ama amshitetsüsa "drone warriors" 500,000 nem training agütsütsü sentong lir.

Tensa melenshia aoba nung tekeraba nung telangzüba agütsütsü nüngdaker, aser Pyongyang nem Russia-i technology teyari agütsür, ta pai ashi.

Kasa mapang Tir Lee-i 2030 tashinung sen \$650 million jenjang defence firms pongu yanglutsü sentong ka sangdonga liasü.

BILEMDANGANG

"Nü ainabong mechi na memerenshitsü, saka nü ainabong agi na merenshitsü."